



Inatsisartut  
Ilaqutariinnermut Peqqissutsimullu Ataatsimiititaliaq  
suuma@ina.alla.gl

09-06-2026  
Sags nr. 2026 - 10010  
Akt. id. 26565099

Postboks 970  
3900 Nuuk  
Tlf. (+299) 34 50 00  
Fax (+299) 34 63 64  
E-mail: isn@nanoq.gl  
www.naalakkersuisut.gl

## **Ataatsimiititaliap UPA2026/147-mut apeqquteqaataanut akissut – 8. juni 2026-mi ilisimatitsiviusumik ataatsimiinneq**

Ilaqutariinnermut Peqqissutsimullu Ataatsimiititaliap Isumaginninnermut, Suliffeqarnermut, Ilaqutariinnut Nunamullu Namminermut Naalakkersuisoq ataasinngornermi 8. juni 2026, nal. 14.30 ilisimatitsiviusumik ataatsimeeqatigiinnissamut aggersarpaa. Sammisaaq imm. 147 erninermi ullormusianut aamma namminersorluni inuussutissarsiuutinik ingerlatsisunut tunngavoq.

Ataatsimiititaliaq imm. UPA2026/147-mik suliaqarnermut tunngatillugu Naalakkersuisumut allakkatigut apeqquteqarpoq. Naalakkersuisup apeqqutit ataani akissuteqarfagai. Apeqqutit ersarissagaapput, akissutaannik malitseqartinneqarlutik.

Akissuteqaatit paasinarsarnerunissaannik nukittorsaaneq eqqarsaatigalugu, Naalakkersuisut eqqumaffigeqquvaat, sulinngiffeqarnerup nalaani ullormusiaqarsinnaatitaanermut akissarsiaqarsinnaatitaanermulluunniit pingaarnertut marlunnik aaqqissuussaqaqmat.

- Erninermi ullormusiat pisortanit ikiorsiissutaapput pisortanit tunniunneqartartut aamma Namminersorlutik Oqartussanit aningaasalersorneqartut.
- Erninermi Aningaasaateqarfiup suliffeqarnermi namminersortunik ikorfartuivoq sulisoqarnermut akitsuuteqarnikkut (AMA-kkut) aningaasalersorneqartoq. Aningaasaateqarfiup siunertaraa sulinngiffeqarnerup nalaani sulisitsisut akissarsianut aningaasartuutaannik naligiissaarinnissaq.

### **1. § 37-imut apeqquteqaammi nr. 226-2025-mut akissutigineqartumi suliffeqarfiit kisimiilluni ingerlanneqartut qulit aningaasaateqarfimmit missaanniittut erninermut aningaasarsianik atatillugu utertitsinissamik sulinngiffeqarnermi qinnuteqarsimasut paasissutissiissutigineqarpoq. Qinnuteqartut quliinnaaneri sumik tunngaveqarpa?**

Qinnuteqartut amerlassusaat pillugit erseqqinnerusunik paasissutissaqanngilaq imaluunniit annertunerusumik tunngavissaqarnani. Suliffeqarfiit kisimiilluni ingerlanneqartut utertitsinissamik qinnuteqartut tigusaqartulluunniit qanoq amerlatigineri pillugit Erninermi Aningaasaateqarfik aaqqissuussaasumik nalunaarsuinngilaq. Taamaattumik § 37



naapertorlugu apeqquummik nr. 226-2025-mik akissuteqaammi amerlassutsit ilisimatitsissutigineqartut pillugit naliliineruvoq inaarutaasumillu naatsorsuinerunani. Amerlassusaat pillugu suliffeqarfiit kisimiilluni ingerlanneqartunut, 2-mut 3-mullu apeqquutini itisilerneqartunut, malittarisassanut attuumassuteqarneranut isigineqartariaqarsorinarpoq.

## 2. Erninermut Atatillugu Sulinngiffeqarnermi Aningaasaateqarfiup inatsisai, atuuffia aamma suliffeqarfiit kisimiilluni ingerlanneqartunit erninermut atatillugu sulinngiffeqarnermi aningaasaateqarfimmik sooq atuisinnaanginersut Naalakkersuisut nassuiarsinnaavaat?

Suliffeqarnermi namminersortunut Erninermi Aningaasaateqarfik Naartunermi, erninermi meeravissartaarnermilu sulinngiffeqartarneq pillugu Inatsisartut inatsisaat nr. 5, 19. november 2020-meersumi kapitali 3-mi malittarisassiunneqarpoq. Kapitalimi tassani malittarisassat sulisitsisunut namminersortunut tamanut, Sulisoqarnermut akitsuut pillugu Inatsisartut inatsisaat pillugu Namminersortutik Oqartussat inatsimmik nalunaarutaanni malittarisassat malillugit sulisoqarnermut akitsuummik akiliisussaataasunut, atuupput.

Aningaasaateqarfiup siunertaraa sulinngiffeqarnermi akissarsianut sulisitsisut aningaasartuutaat naligiissassallugit suliffeqarnermilu pitsaanerusumik naligiissitsineq qulakkeerlugu. Agguaasseqqinnermik aaqqissuussinerup nammaqatigiiffiusup, suliffeqarnermi namminersortuni sulisut erninermi sulinngiffeqarneranni isertitatigut tunngavigisaat appariaateqannginnissaat qulakkeerpaa.

Aningaasaateqarfik sulisitsisut namminersortut tamarmik, sulisoqarnermut akitsuummik (AMA-mik) akiliisussaataasut, peqataasussaataapput. Erninermi Aningaasaateqarfik sulisunut sulinngiffeqartunut akissarsiat pillugit sulisitsisut aningaasartuutaannik utertitsisarpoq. Aningaasaateqarfiup akissarsiat nalinginnaasut minnerpaatut annerpaatullu akigitat 80 %-ii utertittarpai.

Erninermi Aningaasaateqarfik sulisitsisunit namminersortunit, aaqqissuussinermut ilaatinneqartunit atorfilinnullu sulinngiffeqarnerup nalaani akissarsianik aningaasartuuteqartunit, atorneqarsinnaavoq.

Aningaasaateqarfimmik atuinissamut suliffeqarfinnik kisimiilluni ingerlanneqartunut pingaarnertut marlunnik aporfissaqarpoq:

- i. **Aaqqissuussinermi killiliinerup piunasaqaatigaa akissarsiat katinnerat atorfillillu akissarsiaannik aningaasartuuteqarneq:** Erninermi Aningaasaateqarfik sulisitsisunut utertitsinissamut aaqqissuussineruvoq. Utertitsineq sulisitsisup atorfillit sulinngiffeqarnerup nalaani akissarsiaannut attuumassuteqarpoq. Malittarisassap qulakkeerpaa, suliffeqarnermi namminersortuni sulisut sulinngiffeqarnerminni isertitaqarnissamut tunngavigisamit ilaat attatiinnarsinnaanerat.

Suliffeqarfik kisimiilluni ingerlanneqartoq atorfeqartitsinngitsoq inunnet allanut akissarsiat katinnerannik tunniussineq ajorpoq. Taamaalluni suliffeqarfik kisimiilluni ingerlanneqartoq, aningaasaateqarfimmiit utertitsinissamut tunngaviusinnaasunik, atorfillit sulinngiffeqarnerup nalaani akissarsiaannut aningaasartuuteqanngilaq. Utertitsinermik pissarsinissamut atorfilliup



sulinngiffeqarnerup nalaani akissarsiaanut aningaasartuutunik  
utertinneqarsinnaasunik piumasaqaataammat, suliffeqarfiit kisimiilluni  
ingerlanneqartut atorfeqartitsinngitsut Erninermi Aningaasaateqarfimmut  
utertitsinissamut qinnuteqarsinnaanngillat.

- ii. **Suliffeqarfimmik unitsinissaq pillugu piumasaqaat:** Namminersorluni  
inuussutissarsiutillip, piffissami sulinngiffeqarfiusumi suliffeqarfimmik  
ingerlatsinerup unitsinnissaa, pillugu § 48, imm. 1-mi piumasaqaat ilanngullugu  
naammassissavaa, imaluunniit suliffeqarfimmik ingerlatsineq allamut  
tunniutissallugu. Suliffeqarfimmik atorfeqartitsinani piginneqataatitsinaniluunniit  
kisimiilluni ingerlanneqartumut suliffeqarfiup matuneqarneranik  
isumaqarsinnaavoq.

### **Namminersortunut erninermi ullormusiaqarnissamut suli periarfissaqarneq**

Pingaaruuteqarpoq erseqqissassallugu, suliffeqarfimmik kisimiilluni ingerlanneqartut piginnittui  
erninermut atatillugu pisinnaatitaaffiigaanngimmata. Namminersortut pisortanit erninermi  
ullormusiaqarsinnaapput.

Namminersorluni inuussutissarsiortoq, § 48-mi malittarisassanik eqquutitsisoq, peqatigalugulu  
erninermi ullormusiaqarnissamut malittarisassanik nalinginnaasunik naammassinnittoq,  
Nunatta Karsianik aningaasalersorneqartumik erninermi ullormusiaqarsinnaatitaavoq.

Suliffeqarfik unitsinneqarpat, aamma erninermi ikiorsiissutit sulinermik isertitanut taarsiullugit  
atuutilerlutik, tunngaviit assingi malillugit erninermi ullormusiat tunniunneqassapput. Akigitat  
sulisumut ilinniarsimangitsumut minnerpaamik akissarsiat qaqugukkulluunniit atuuttut  
malippaat aamma sapaatit akunnerini kingullerni 13-ini piffissaq suliffiusoq aallaavigalugu  
naatsorsorneqartarlutik, minnerpaamik sapaatip akunneranut akunnerit 14-it.

### **3. Erninermut atatillugu ullormusianik pisartagaqarniaraanni namminersorlutik suliffeqarfiutillit suliffeqarfiutertik matuneqaqqaartariaqarnerannut sumik tunngaviusumik pissuteqarpa?**

Suliffeqarfimmik kisimiilluni ingerlatsineq piginnittualu tassaapput inatsisitigut  
akileraartarnikkullu inuk ataaseq. Taamaattumik piginnittup suliffeqarfiup sinneqartoorutai  
imminut kisimi tunniussinnaavai, taakkulu B-tut isertitatut akileraaruserneqartussaallutik,  
taamaattumillu suliffeqarfik kisimiilluni ingerlanneqartoq, aningaasaateqarfimmiit  
utertitsinissamut tunngaviusinnaasunik, atorfillit sulinngiffeqarnerup nalaani akissarsiaannut  
aningaasartuuteqarnani. Akerlianik piginnittup ingerlatsivimmik pilersitsiguni namminermut  
imminut atorfinitsilluni, pineqartoq imminut akissarsiaqartissinnaavoq, kisianni suliffeqarfik  
kisimiilluni ingerlatsinertut taaneqarsinnaajunnaassaaq.

Erninermi aningaasaateqarfikkut utertitsinermik tigusaqassagaanni, suliffeqarfik sulisitsisutut  
aaqqissuussinermut ilaatinneqarnissaanik aamma atorfillit sulinngiffeqarnerup nalaani  
utertinneqarsinnaasunik akissarsiaannut aningaasartuuteqarnissaaq piumasaqaataavoq.  
Taamaattumik aaqqissuussineq suliffeqarfimmut kisimiilluni ingerlanneqartunut  
atorfeqartitsinngitsunut annertusineqassappat, aningaasalersuinissamut, akiliutit  
tunngavissaannut, nakkutilliinissamut immikkut isummernissaaq piumasaqaataavoq.

### **Taarsiissuteqarnissamut tunngavik**



Erninermi ullormusiat suliffimmiit peqannginnermi sulinermik isertitaqannginnermut taarsiissuteqarnertut eqqarsaatigineqarput. Taamaattumik pingaaruteqarluinnarpoq, suliffiup unitsikkallarnissaa, taamaalillutik angajoqqaat meeqqamik ukkataqarsinnaaniassammata. Erninermi ullormusiat suli inuussutissarsiutip ingerlanneqarnissaanut akissarsiaqanissamullu tapertut eqqarsaatigineqanngillat.

Tunngavik § 37 naapertorlugu apeqqummut nr. 226-2025-mut akissuteqaammi itisilerneqarpoq. Eqqumaffigisassat pingasut imminnut ataqatigiit takuneqarsinnaapput:

### **1. Allaffissornermut eqqumaffigisassaq:**

Namminersorlutik inuussutissarsiutiminnik suli ingerlatsisunut erninermi ullormusianik tunniussisarnissaaq pinngitsoortinniarlugu, suliffeqarfimmik unitsitsinissaaq pillugu piumasaqaat atuutilersinneqarpoq. Suliffeqarfimmik unitsitsineq pillugu piumasaqaatip ersarissup, erninermi ullormusiaqarsinnaatitaanermut allaffissornikkut naliliinissaaq paasiuminarsisippaa. Suliffeqarfimmik kisimiilluni ingerlataqartut malittarisassat atuuttut malillugit erninermi aningaasaateqarfimmut akiliuteqarneq ajormata, suliffeqarfimmik unitsitsineq pillugu malittarisassap suliffeqarfimmik kisimiilluni ingerlatsinissamut piginnittut nunatta karsianiit erninermi ullormusiaqarnermik atuisinnaanerit periarfissippai.

### **2. Nakkutilliinermut eqqumaffigisassaq:**

Suliffeqarfimmik unitsitsinissaaq pillugu malittarisassaaqanngitsuuppat, suliffeqarfimmik kisimiilluni ingerlatsisunik kommuniniit nakkutilliisoqarnissamut assinganik pisariaqartitsisoqassagaluarpoo. Tamatuma kingunerivaa isertitanik nakkutilliineq ingerlaavartoq aamma inuussutissarsiummik ingerlatsinerup annertussusaa pillugu ataasiakkaaraluni naliliinerit. Naliliifigineqarpoq, taamatut nakkutilliineq misissuinerlu annertuumik isumalluutini atuisitsissasoq.

Suliffeqarfimmik kisimiilluni ingerlatsisut erninermi aningaasaateqarfimmi utertitsinissamut aaqqissuussinermut ilaatinneqalissappata, nakkutilliinermi eqqumaffigisassap assinga atuutissaaq. Erninermi sulinngiffeqarnerup nalaani ingerlatsineq tamarmi unitsinneqarnerisooq pillugu Erninermi Aningaasaateqarfiup nakkutilliiniarnera ajornakusussagaluarpoo. Suliffeqarfimmik unitsitsinissaaq pillugu piumasaqaatip suli inuussutissarsiummik isertitaqarnerup saniatigut erninermi ullormusianik tunniussisoqarsinnaanera aarlerinanginnerulersippaa.

### **3. Killiliinermut eqqumaffigisassaq:**

Inuussutissarsiornermik ingerlatsinerup aamma akissarsiaqartut namminersortullu akimorlugit akornanni aaqqissuussap erseqqissumik assigiiaartumillu killiliisoqarnissaa qulakkeerppaa. Inatsisartut inatsisaat erninermi sulinngiffeqarneq tassaasoq suliffimmiit peqannginnerpiamik piumasaqaateqarneq pillugu tunngaveqarpoq. Tunngaviup assinga § 48, imm. 2-mi, aappaasut ikiortaanerit sulinngiffeqarnerup nalaani ikiutinngippata aatsaat pisinnaatitaanerit, ersersinneqarpoq.

### **Allamik aaqqissuussamik periarfissanik misissuinissamut pisariaqartitsineq**

Naalakkersuisut nassuerutigaaq, suliffeqarfimmut kisimiilluni ingerlanneqartunut malittarisassat naammassinissaat ajornakusoorsinnaasoq. Naalakkersuisut suliffeqarfiit kisimiilluni ingerlanneqartut, piginnittuisa erninermi ullormusianik tunineqarsinnaaniassammata, matuneqarnissaat kissaatiginngilaat. Suliffeqarfiit kisimiilluni ingerlanneqartut siunissami aaqqissuussinermut, tassunga ilanngullugu Erninermi



Aningaasaateqarfik pillugu aqqissuussinermut, ilaatinneqarsinnaanersut aningaasalersuineq, nakkutillineq killiliinerlu illersorneqarsinnaasumik aaqqiivigineqarsinnaappata, ilanngullugu misissorneqartariaqarpoq.

Naalakkersuisut immikkoortukkut UPA2026\_169-ikkut, angajoqqaat suliffeqarnerat apeqqutaatinnagu, erninermi ullormusiat pitsanngorsaaviginissaat siunertaralugu ilusiliinernik pingasunik saqqummiussinissamut suliaqaqqusaareerput. Ilusiliinerit ilaanni minnerpaamik ataatsimi erninermi ullormusianik minnerpaamik akigititap qaffannissaat ilaatinneqassaaq. Ilusiliinerit inatsisitigut, aningaasaqarnikkut allaffissornikkullu kingunerisassai pillugit naliliinermik imaqaassapput. Aaqqiissutissamut ilusiliinerit minnerpaamik pingasut, erninermi inatsisit atuuttut kingusinnerpaamik UKA2027-mi iluarsaanneqarsinnaaneri siunertaralugu, 2026-p naannginnerani saqqummiunneqassapput.

Naalakkersuisut sulinermut tassunga atatillugu suliffeqarfiit kisimiilluni ingerlanneqartut pillugit malittarisassat misissorniarlugit kissaateqarput.

Inussiarnersumik inuulluaqqusillunga

  
Maritha Broberg